

**Erich Bolinius**

[www.erichbolinius.de](http://www.erichbolinius.de)

[Erich.Bolinus@t-online.de](mailto:Erich.Bolinus@t-online.de)

## **Bericht über den BSV Kickers Emden - Sendung „Flutlicht“ auf Radio Ostfriesland**

**Donnerstag, 21.6.2012 18.05 Uhr** auf 94.0 bzw. 87,7

Leev Toehörers,

de Foetball-Europameisterskupp geiht in de lesd Runnen. Bither hett sük uns düütske Mannskupp ja goed slaan, wenn man na de Resultaten geiht. Man so recht overtügend, as wi seker all hoopt hebben, was dat neet. Was ´n Zitterspöl tegen Dänemark. Man wunnen is wunnen! Nu geiht dat Freedag tegen Griechenland, de Mürkers unner de Mannskuppen bi de Europameisterskupp in Polen un de Unkraine. Aber ik bün seker, dat uns Mannskupp noch beter as bither spölt un tegen de Griechen winnen. Freien wi uns up dat Spöl in d` Kiekkast mörgen Avend.

Man nu toe Kickers Emden. Heel völ Freid hett uns de Vereen in de lesd Tied ja neet maakt. Maandenlang gaff dat bold blot schlecht Narichten, wall Kickers Insolvenz anmelden muss. Man lesd Saterdag dürs in de Oostfreesland-Stadion ennelk weer maal jubelt worden. **De A-Jögdmannskupp** van Kickers Emden spölte för 500 Toekiekers tegen de SC Langenhagen 1:1. Un dat riekte ut, um Meister in de Landesliga Neddersassen toe worden. Trainer **Yasin Turan** harr na dat Spöl Tranen in Ogen un was up sien Mannskupp stolt. Un dat mit Recht! Turans Nafolger, **Christian Rosendahl**, dürt dor dör mit de neei U19-Mannskupp in de komende Saison in de tweethoogste Juniorenklass in Düütskland spölen.

De Emden Jungs harren in disse „Finalspöl“ de betere Start. All na drie Menüten verpassten se de Föhren, as **Thilo Janssen** na ´n Eckball mit ´n Koppball blot de Latt truff. Man dorna kwamm Langenhagen mehr un mehr up. Un in de 20. Menüte was dat dann sowiet. Langenhagen gung dör **Christian Damakoudes** mit 1:0 in Föhren. Umdat na de Rügstand bi Kickers neet mehr völ leep, namm Trainer Turan de defensiv Middelfeldspöler **Ayaovi Bamezon** rut un broch dorvör de Störmer Tido Tuitjer. Un dat mook sük betahlt. Kickers wurr vörn gefahrelker un na 42. Menüten gleek **Tido Steffens** toe dat 1:1 ut. För hum was dat de 24. Saisontor. Dortoe kann man ok blot galeeren.

In de 2. Halvtied was dat dann ´n open Schlaguttuusk. Kansen för ´n Tor gaff dat up beid Sieden. Tido Steffens harr dorbi glik 3 Maal heel goed Torkansen, man de Ball wull neet in de Kasten van Langenhagen. So müssen de Mannskupp van Kickers un de Toekiekers noch zittern, bevör na 93 Menüten dat Spöl toe Enn gung un all Emders jubeln kunnen.

Ok van disse Stee graleer ik de Jungs van Kickers Emden noch eenmaal heel hartelk. De meisten treffen wi ja in de komende Saison in de 1. Mannskupp van Kickers Emden in de Landesliga weer. Was moi, wenn de dann ok an Enn van de Saison over de Upstieg sük ok so freien kunnen.

De **B-Junioren** van Kickers Emden spölten in Göttingen 1:1. De jung Kickersmannskupp funn goed in ´t Spöl. Man de Toren fullen eerst in de 2. Halvtied, ofwall Kickers ok anfangs goed Kansen harr. In der 64. Menüte knackten de Göttinger de goed Achtermannskupp van de Emders.

Middelstörmer **Janek Lamine Diop** was de Torschütze toe 1:0 för de Gastgeber. Glik dorup, na de Anstöt, kunn **Janek Grünebast** toe dat 1:1 utglikken. Of de Jungs in de Klasse blieven, entscheddt sük an disse Wekenenn. Kickers mutt na de Tabellenföhrer HSC Hannover. Dat word stur för de Jungs, man wi drücken beid Dumen för Kickers B-Junioren.

Leev Toehörers,  
vannabend steiht bi de Europameisterskupp dat Spöl Tschechien tegen Portugal an. Ik hebb  
för Portugal tippt. Bün gespannt, of ik recht ligg. Bither lagg ik meistens dortegen.

So, nu as alltied, noch ´n Foetballwitz:

De Hochtiedsfier is vörbi. De jung Ehemann draggt sien Frau in ´t Huus un leggt hör up Bedd.  
Se fangt glik an, sük uttoetrecken un giff hum mit verdrehte Ogen toe verstahn, doch glik  
toe hör toe komen. Dor seggt he an hör: „Du hest mi lang wachen laten, bit wi verheiraadt  
sünd. Nu musst du wachen, bit dat Foetballspöl van Düütskland bi de Europameisterskupp in  
de Kiekkast toe Enn is.“

Ja, mien Damen, so kann dat wesen, wenn man ´n Foetballfan heiraden deit.

So, leev Toehörers van Radio Oostfreesland,  
ik hoop, Joe hett dat Plattdütsk gefallen, denn mien Motto heet ja alltied,  
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.